



TATA IBADAH PARTONGGOAN UJUNG TAHUN GKPS DISTRIK IV



Kamis, 31 Desember 2020

THEMA :

Ibohali Manghobaskon Horja na Madear (2 Tim. 3:17)

SUB THEMA:

“Pasirsir ma Kuria in gabe Sipambobai na Toruh Maruhur, Sihabiari Naibata, Sibalosi Ajar, ibagas Biak na Madear, ase Lambin Tarbarita Goran ni Kristus”
(Mateus 5 : 18-19, Markus 9 : 35)

I. Persiapan

1. Tugah-tugah pasal Ibadah
2. Barisan prosesi mamasuki ruang ibadah

Mandoding Haleluya No. 402 : 1

(Jongjong Kuria)

Puji ma Naibatanta, bai ianan Na Pansing-Nin,
bai paratas hamuliaon-Nin. Haleluya! Haleluya! Puji ma Naibata.
Pasangap ma goran-Ni, halani pambahenan-Nin,
ampakon hagogohon-Nin. Haleluya! Haleluya! Pasangap Naibata.
Pahata ma tarompit ‘ge arbab pe, irandu pakon gonrang husapi pe.
Irik homa sarunei ‘ge sordam pe, sonai ampakon ogung marolol bei.
Puji ma! Rumbuk ma baen parhatani parugas in.
Sombah ma! Marhiteihon ni dodong na lulur ijin.

II. IBADAH

1. Votum – Introitus – Tonggo

P : Ibagas goran ni Naibata Bapa pakon Tuhan Jesus Kristus ampa
Tonduy Napansing, Sitompa langit pakon tanoh on.

P+K : Amen.

P : Tongon, tonggor ma, Ahu manompa langit na baru pakon tanoh
na baru!

K : Anjaha seng be ingaton na parlobei in, barang puho ibagas uhur

P : Tapi marmalas ni uhur anjaha marolob-olob ma hanima ronsi
sadokah ni dokahni marhitei na hutompa ai.

K : Ai tonggor ma, Ahu do manompa Jerusalem gabe parolob-
oloban anjaha bangsa pangisini gabe malas ni uhur.

P : Marolob-olob do Ahu mangidah Jerusalem.

K : Anjaha marmalas ni uhur mangidah bangsa-Ku

P : Seng tarbogei be ijai sora na tangis-tangis

K : Atap sora na doruh-doruh

P+K : *(Mandodingkon Reff. Haleluya No. 402)*

Pahata ma tarompit ‘ge arbab pe, irandu pakon gonrang husapi pe.
Irik homa sarunei ‘ge sordam pe, sonai ampakon ogung marolol bei.
Puji ma! Rumbuk ma baen parhatani parugas in.
Sombah ma! Marhiteihon ni dodong na lulur ijin.

P : Martonggo ma hita,

Ham Tuhan Naibata Jahowa, Simada ronsi mungkahni ganup na adong,
Sitobus ronsi Sipaluah nami, kuria na pinilih-Mu. Diatei tupa ma sombah
nami Bamu halani idop pakon holong ni atei-Mu na tongtong mangkasomani
hanami ibagas satahun on. Iparorot anjaha ipatalup Ham, hanami das bani

ujungni tahun on. Halani ai Tuhan, sada do uhur nami borgin on laho mamuji pakon pasangapon-Mu, ronsi mangindo gogoh huBamu bani na sihol hanami manjahon tahun na baru na sihol berehononMu use bannami. Holong ma Ham Tuhan, balosi Ham tonggo nami on. Ibagas goran ni Tuhan Jesus hanami martonggo huBamu. Amen. *(hundul kuria)*

2. Mandoding Haleluya No. 372:1-2

Sai pasiat Tuhan Jesus, roh hu bagas uhurmin
Tarpaima-ima Jesus bogei panuktukNi in
Sai pasiat Tuhan Jesus, das hu bani uhurmin
Nuan ari paridopan ulang sompat salpu in
Hamegahon na i tanoh, in do isarion ho
Pardomuan pakon Jesus, gabe ilupahon ho
Sai pasiat Tuhan Jesus, das hubagas uhurmin
Nuan ari paridopan, ulang sompat salpu in.

3. REFLEKSI KILAS BALIK TAHUN 2020

Paragenda : Kuria na hinarga ni Tuhan Jesus Kristus. Ibagas na satahun bolon on domma idalani hita ari-ari ni голуhta marhitei dear layak ampa idop ni uhur ni Naibata na so marnarotap. Naibata tongtong do mangiring-iring голуhta bani ganup panorang. Bagei do pengalaman ni goluh na iahapkon hita ibagas na setahun on. Buei do hamaholon na idompakon hita tarlobih ma ai pangkorhon ni Covid-19 na lang hatontuan on. Hansi pe sonai, boi do tong ibontasi hita tahun on marhitei idop ni uhur ni Naibata. Halani ai dompakkon hita ma Covid-19 on ibagas na torang maruhur, porsaya paboa ibotoh Naibata do aha sidearan sibahenon-Ni banta ibagas na totap mambalosi protokol kesehatan. Anjaha totap ma marmalal ni uhur halani boi do ibolus hita haganupan namasa in ronsi ipadipar do hita das hubani ujungni tahun on. Haganup ai pitah halani ipardimata Tuhan in do hita, ase patut ma tongon hita martarima kasih laho mamuji pakon pasangapkon Tuhan in.

Bapa : Hanami salaku Bapa, dihut do homa marmalal ni uhur bani panorang on, halani iahapkon hanami do bueini pasu-pasu na dob ijalo hanami bapa kuria on. Hansi pe tongon buei do hamaholon na idompakkon hanami ibagas na mandalankon tanggungjawab ampa kewajiban gabe bapa irumah tangga sonai age i kuria in. Tapi mangahap do hanami na ipargogohi Tuhan in do hanami ase boi hanami jongjong nuan on ampa mamboan keluarga nami hulobei-Mu. Tarimakasih ma bamu Tuhan. Tarpuji ma Ham tongtong itongah-tongah keluarga nami.

Inang : Bani hajongjongan nami salaku inang, iahapkon hanami do bahasa sonin ma bueini kesibukan itongah-tongah ni keluarga. Anggo na pingkiri songon na lang boi do das bani ujung ni Tahun on, anggo pitah mangajamhon gogoh, atap pingkirannami sandiri. Sonari lambin tangkas do pasu-pasu-Mu bennami. Pori pe sipata maruntol do hanami bani namandalani goluh nami siganup ari, tapi tarima kasih ma bani gogoh pakon pangurupion-Mu, halani ai tarpuji ma Ham Tuhan.

Niombah : Buei do hamaholon na idompakkon hanami manipat satahun on, tarlobih bani tahun 2020 on haganupan kegiatan pendidikan nami via online halani covid-19. Tapi patut do hanami martarimakasih huBamu halani ihasomani, iramotkon janah itogu-togu Ham do hanami ibagas holong-Mu na banggal in. Tarpuji ma Ham Jesus Kristus, Tuhan nami.

Majelis : Patut do hita manaili dompak pudu bani nolih na dob ihorjahonta manipat satahun bolon on. Buei tumang do horja na ipaondos hubanta salaku juak-juakni Naibata. Ipalar do hape hita gabe parhorja ipohon anggur-Ni. Tongon anggo iidah hita nolihta i kuria in, lang tarhorjahon hita in anggo lang marhitei pangurupion pakon pangkasomanion ni Tuhan. Ai jolma na galek anjaha pardousa do hita. Halani ai bani panorang on, patut do hita marunduk ni uhur laho martarima kasih hubani Tuhan, anjaha sirsir laho pabayuhon hauhuron ampa pingkiranta.

Paragenda : Talup do tongon hita mamuji Jahowa, Naibatanta in halani haganup hinadearni layak-Ni.

P + K : *(Mandodingkon Haleluya No. 472:1)*
Seng adong na dos, songon Ham o Tuhan,
na sai sirsir mangkasomani hanai on.
Pitah Ham tongon, Naibata na sintong,
ganup pambaenan-Mu gok halongangan do.
Sagala bangsa do, na jinadihon-Mu,
Marsombah roh hu lobei-Mu.
Pasangapkon Ham, ronsi sadokahnin,
timbul janah pansing do goran-Mu ijin.

4. Mandoding Haleluya No. 238: 1-2

Sai hu lobeiMu Tuhanku, hu useihon uhurhon
Sai pasiat Ham tonggongku, pakon ganup iluhkon
Husolsoli do uhurhu, na gok dousa in tong- tong
Ai buei ari- aringku hu parambur- ambur tong

5. Pengakuan pakon Hasasapan ni Dousa

Paragenda : Hita haganupan kuria ni Tuhan Jesus Kristus, lang piga dokah nari tadingkononta ma tahun 2020 anjaha masukonta ma tahun 2021. Domma dong pengakuanta bahasa pitah halani idopni uhur-Ni tumang do mambahen boi hita das hubani ujung ni tahun on. Bani namandalani satahun bolon in, buei tumang do dousa pakon panlanggaron ihorjahon hita marhitei uhur, pingkiran sonai age pangabakta. Halani ai sopotkon hita ma dosanta ilobei-lobei Tuhan Naibata.

Majelis : Tuhan, hanami do tongon haondosan ni horja pangidangion i tongah-tongah ni kuria-Mu, tapi gati do hampung uhur nami laho mangkorjahon in. Lang humbani gokni uhur pakon pingkiran, hanami mangidangi kuria in. Sipata gogoh pakon pikiran nami sandiri do hansa na iajamhon hanami, dobnai lang marulih hanami age kuria na iidangi hanami. Unduk uhurnami i lobei-lobei-Mu mansopothon dousa nami.

Bapa : Domma iakuhon anjaha ijalo hanami gabe malim i tongah-tongahni keluarga. Bani bagei-bagei ni hangaluton na idompakhon hanami itongah-tongahni keluarga gati do mambahen tubuh ringis bani hadirion nami mambahen mangarou keluarga. Sipata taruyun do hanami mangkorjahon horja na lang mangkargahon keluarga nami. Bani ujung ni tahun on roh hanami mangelek hu Bamu. Idop ma uhur-Mu sasap Ham ma dousanami.

Niombah : Gati do lang ihatengerhon hanami Ham Tuhan bani nalaho mamparayak sura-surunami. Ijin lang jumpah sininta ni uhur, tubuh ma pandoleian, dob ni mansalahkon Tuhan. Ham Tuhan bobai anjaha pargogohi Ham ma hanami ase bani namandalani tahun baru on totap ma Ham gabe pangajamannami. Ham Tuhan idopma uhur-Mu bennami pardousa on.

Inang : (Mandodingkon Hal. 237:1) Roh ham bai Jesus, roh ham botul, Tangar hata-Ni jalo bujur, Na roh do Jesus pagoluh ham, Asal porsaya Ham Malas do uhurta in use, ai borsih humbani dousa pe Sai roh ma hita hu surga in, ai sonang do ijin

Paragenda: Hita haganupan Kuria ni Tuhan, ai seng ra Tuhan in mangambukkon halak sisadokahni dokahni. Age pe domma marhoru ibahen, holong do use uhur-Ni romban hubani hinabueini idop ni uhur-Ni. Bani halak na sintong-sintong manolsoli haganupan dousani, ihatahon do : “Idop ni uhur-Ni Jahowa do na

so ra marpunsa, seng marnarotap holong ni atei-Ni. Mulak ratah do ai siap sogod, banggal do habonaron-Mu”.

P + K : Hasangapon, Hamuliaon, ampa puji-puji ma bani Naibata ronsi sadokahni dokahni. Amen.

6. Mandoding Haleluya No. 50 : 1-2

Sai na margantih tahun on sonin rosi magira Jesus baen ham uhurhon ase tongtong marhira Bai parsurutni ajalhin, janah manimbang ujungnin. Iudut Ham do hosahkin paidah-idah ahu, Atap na dong do buah ni horja-Mu in hu bangku; Hape gati hiranam Ham: Buah ni in seng jumpah Ham

7. Acara khusus

- Mambasa Statistik
- Peluncuran Logo
- Tonggo Pangapition

8. Mandoding Haleluya No. 404 : 1 – 2

Ganup ari do in, ronsi tahun hu taun, Sihol do hudodingkon Goran-Mu Ham Tuhan Naibata, sai hupuji do Ham, Halani haganup layak-Mu Ham arta na harga poltik hujolom in, Humbani na hinan, Ham do tong Naibatangkin Bonani na dear ronsi sadokahnin Panondang na liar, bai ganup na golap in HataMu do Tuhan, hupindahi nuan, Bahen suluh bai pardalanankin Pitah Ham hansa in, na mambotoh ijin, Aha na huporluhon Tuhan Ham arta na harga poltik hujolom in Humbani na hinan, Ham do tong Naibatangkin Bonani na dear ronsi sadokahnin Panondang na liar, bai ganup na golap in

9. Ambilan : 1 Petrus 1: 22-25

Shalom hubanta haganupan

Kuria Kristus Jesus. Bani ibadah partonggoan Ujung Tahun Sadarion, Hata ni Tuhan mangondolhon hubanta sonaha do caranta ase boi hita berperan aktif mandalankon goluh ibagas hapansingon ampa pataridahkon holong na humbani Tuhan in. Porlu ipasirsir hita dirinta gabe harosuhni Tuhanta. Marhitei ayat 22, ipaingat hita bahasa pambalasion na sintong na humbani Naibata mangurupi hita laho pataridahkon praktek holong na lang marsipakulah-kulah bani goluhta on. Pambalasion on do homa na paborsihkon hita humbani

haganupan akal-akal. Selanjutni, Petrus patugahkon on halani ia sandiri pe mangkatahon paboa Naibata sandiri do na paborsihkon uhur ni halak non Jahudi marhitei haporsayaon. Halani ai pambalasion bani hasintongan na humbani Naibata in do mambobai hita ase totap porsaya bani panghopkopon ni Tuhan Jesus Kristus in. Anjaha anggo totap haporsayaon hubani Tuhan Jesus in, ijai do homa boi tubuh pangarapan na manggoluh bani dirinta.

Hita haganupan. Bani ayat selanjutni (ay. 23) iojur hita ase manggoluh marhitei goluh na baru marhitei hata hagoluhan in. Hal na terutama banta aima marhitei hata namanggoluh bani dirinta aido na mambobai hita manggoluh ibagas goluh na baru. Haganupan do hita manghasiholhon ase dong perubahan hubani na lobih dear bani goluhta on bahkan bagei-bagei do cara ibahen hita ase goluhta on lamin roh dearni hulobeian ni ari. Anggo bani ujung tahun somal do bani keluarga marsipodah-podahan janah marsimaaf-maafan domu hubani persaoran na lobih dear. Manggoluh ibagas hata hagoluhan in, tontu on ma nasinobut manggoluh ibagas goluh na baru. Marhiteihonni ujung tahun ijon, na ija stokkin nari tadingkononta ma tahun 2020 on janah jumpahkononta ma tahun 2021, manaili ma hita bani goluhta satahun bolon on, evaluasi hita ma goluhta janah tadingkon hita ma na lang ma dear in bani tahun 2020 on. semangat ma hita laho mandompakkon perubahan ni goluh ta bani tahun 2021. Lambin roh orod ni ma hita hubani Tuhan anjaha lambin manggoluh ibagas hata ni Tuhan in ma hita. Salpu ma tahun on tapi anggo pasu-pasu ni Naibata seng marna salpu. On ma pangarapantanta ibagas haporsayaonta ase ulang marnasoh hita mandalani goluhta ibagas hata hagoluhan na humbani Tuhan in.

Hita na hinarga ni Kristus Jesus Tuhanta in. Bani ayat 24-25 paboa haganupan na adong i tanoh maningon salpu do, anjaha bani ayat 25 ihatahon paboa pitah sada do na lang boi salpu ai ma hata ni Tuhan in. Hata ni Tuhanta on paingathon hita ase manggoluh hita ibagas hata hagoluhan in, ai ma Jesus Kristus Tuhanta in. Ase anggo domma manggoluh hita ibagas Jesus Kristus in, pataridahkon hita ma homa buah-buah na madear bani pargoluhan ta si ganup ari. Domma bahat pengalamanta bani satahun on, sipata jumpah malas ni uhur sipata jumpah pusok ni uhur. Tapi na pasti haganupan situasi goluhta bani na satahun on lang lingod ai humbani panonggor ni Jahowa. Malas ma uhurta, halani ibere ope panorang banta laho intropeksi diri bani mangujungi tahun on anjaha bani na sihol mamasuki hita hu tahun na bayu. Goluhta maningon totap ibagas gomgoman ampa panramotion ni Tuhan Naibata. Lambin optimis ma hita mandalani goluhta marhasoman Tuhan Jesus Kristus na mambobai hita hubani dalam dalam hasintongan ampa hagoluhan na totap ronsi sadokah ni dokahni. Amen.

10. Mandoding Haleluya No. 340 : 1-2 (Irik Patumpu Galangan)

Huondoskon bani Jesus haganupan diringkon

Ia do pasangaponku sadokah bai goluhkon
Huondoskon ma, huondoskon ma.
Bani Jesus Sipaluah, huondoskon ma
Huondoskon bani Jesus haganupan goluhkon.
Hutadingkon ganup dousa, huihutkon Tuhan in.
Huondoskon ma, huondoskon ma.
Bani Jesus Sipaluah, huondoskon ma

11. Tonggo Panutup - Pasu-pasu

- P** : Riap ma hita jongjong! Martonggo ma hita.
Ham Tuhan Naibata Bapa nami, tarima kasih ma Bamu bani ganupan pasu-pasu na dob ondos hubennami, ibere Ham hape panorang hubannami mamilangi bueini pasu-pasuMu na ijalo hanami das hubani ujung ni tahun on. Ijon iondoskon hanami do humbani pasu-pasu-Mu in gabe galangan hatarimakasihon nami hu-Bamu. Sai jalo Ham ma galangan nami on bahen hasangapon ni goran-Mu. Ibagas Goran ni Anakmu Jesus Kristus hanami martonggo.
- K** : Sondangi Ham ma pardalanannami, ase ulang tarjiris hanami bani goluh on, tapi totap marpangarapan hu-Bamu
- P** : Ajari Ham ma hanami pataridahkon buah-buah hadearon bani goluhnami
- P+K** : Sai gok do pamanganku padashon puji-pujian hu bamu, gok hahormaton ma au sadokah goluhku
- K** : Sai baritahonon ni pamanganhu ma hapintoran-Mu, sonai age haluahon na humBamu bani ganup sidalananku
- P** : Riap ma hita martonggo marhitei tonggo naniajarhonni Tuhan Jesus hubanta.
- P+K** : Ham Bapa nami
- P** : Jalo nasiam (hita) ma pasu-pasu humbani Tuhan Naibatanta :
Idop ni uhur ni Tuhanta Jesus Kristus, pakon holong ni atei ni Naibata Bapa, ampa parsoraan ni Tonduy Na Pansing ma manghasomani nasiam (hita) haganupan.
- P+K** : (Mandodingkon) Amen... Amen... Amen...